


山谷外集

卷一至卷四款
五之七

漢書門			
類	一〇二三一號	七四函	九架
冊	七	冊	七

内閣文庫			
漢書	特四十四	一〇二三一	七
冊	七	冊	七

内閣文庫			
番號	漢	10231	
冊數	?	(5)	
函號	3	2	



原本の文字など不明瞭な個所があります。

豫章先生外集卷第五

淺草文庫

古詩

西澤寺之石

題落星寺四首

星宮游空何時落著地亦化為寶坊詩
人晝吟山入座醉客夜愕江撼牀蜜蜂房
各自開牖戶蟻穴或夢封侯王不知青
雲梯幾級更借瘦藤尋上方

崑崙正俗先生廬其下宮庭水所都北



辰九關隔雲雨南極一星在江湖相粘
蟾山作居室竅鑿混沌無完膚萬鼓春
撞夜濤湧驪龍莫睡失明珠

落星開士深結屋龍閣老翁來賦詩寺

擇隆作宴坐小軒 為落星之勝處 小雨藏山客坐久長

江接天帆到遲宴寢清香與世隔畫圖

妙絕一作絕筆 無人知曾隆畫甚富而寒 蜂

房各自開戶牖處處煮茶藤一枝

北風吹倒落星寺吾與伯倫俱醉眠螟

蛉螺羸但癡坐夜寒南北斗垂天戲題落星

寺壁時與劉道絕俱在

玉京軒玉京山爐峯下落星寺僧開軒對之

蒼山其下白玉京五城十二樓鬱儀結

鄰常杲杲紫雲黃霧鏤玄關雷驅不祥

電揮掃上有千年來歸之白鶴下有萬

世不凋之瑤草野僧雲卧對開軒一鉢

安巢若飛鳥北風卷沙過夜窻枕底鯨
波撼蓬島箇中即是地行仙但使心閑
自難老

過致政屯田劉公隱廬

兒時拜公床眼碧眉紫煙舍前築茅茨
爐香坐僧禪女奴煮嬰粟石盆瀉機泉
今來掃門巷竹間翁蛻蟬堂空列五老
勝氣失江山石盆爛黃土茅齋薪壞椽

女奴爲民妻又瘞蒿里園當年笑語地
華屋轉朱欄課兒種松子傘蓋上參天
投策數去日木行天再環先生古人風
鐵膽石肺肝眼前不可意壯日掛其冠
解衣廬君峯洗耳瀑布源霧豹藏文章
驚世時一斑衆人初易之乂遠乃見難
憶昔子政在爲翁數解顏五兵森武庫
河漢落舌端王陽已富貴塵冠不肯彈

呻吟刊十史凡例墨新乾宰木忽拱把
相望風隧寒百楹書萬卷少子似翁賢

題杜槃澗叟真鴻亭

少陵杜鴻漸頗薰知見香風流有諸孫
結屋廬山陽藉交遊俠窟獵艷少年場
光恠驚鄰里収身反摧藏江湖拍天流
羅網蓋稻梁安能衍衍飽遂欲冥冥翔
畏影走萬里不如就陰涼亭東亭西渺

煙水稻田衲子交行李古靈菴下倚寒
藤莫向明窓鑽故紙

官亭湖

左手作圓右手方世人機敏便可爾一
風分送南北舟斟酌鬼神宜有此江津
留語同濟僧他日求我於官亭吁嗟人
蓋自有口獨爲藥公不舉酒藥公千歲
湖冥冥白茅縮酒巫送迎朱轡阜蓋來

託宿不聽靈君專此屋雄鴨去隨鷗鳥
飛老巫莫歌望翁歸貝闕珠宮開水府
雨棟風簾豈來處平生來往湖上舟一
官四十已包羞靈君如願儻可乞收此
桑榆老故丘

泊大孤山作

庚申十
二月

匯澤爲彭蠡其容化鯤鵬中流擢寒山
正色且無朋其下蛟龍卧宮譙珠貝層

朝雲與莫雨何處會高陵不見凌波韞
靚粧照澄凝空餘血食地猿嘯枯楠藤
高帆駕天來落葉聚秋蠅幽明異禮樂
忠信豈其憑風波浩平陸何向非履冰
安得曠達士霜晴嘗一登

貴池

池人祀昭明爲郭西九郎
時新覆大舟水死十二人

以爲神
之威也

橫雲初抹漆爛漫南紀黑不見九華峯

如與親友隔憶當秋景明九老對几席
何曾閉蓬牕卧聽寒雨滴不食貴池魚
喜尋昭明宅筆硯鼠行塵芝菌生銅鬲
思成佳句夢貽我錦數尺屬者浪吞舟
風雹更附益老翁哭婦兒相將難再得
存亡如日月薄蝕行道失流俗暗本原
謂神吐其食神理儻有私丘禱久以默

大雷口阻風

庚寅

號艣下滄江避風大雷口天與水模糊
不復知地厚誰家上江帆狂追雪山走
孤村無十室旅飯困三韭黃蘆麋鹿場
此地廣千肘得禽多文章肯顧魚貫柳
莽蒼天物悲彫弓故在手鹿鳴猶念群
雉媒竟賣友商人萬斛舩挂席上牛斗
橫笛倚柁樓波深蒼龍吼失水不能神
伐葭作城守欲寄大雷書徃問長干婦

何當揖迎汝秦淮綠如酒

庚寅乙未猶泊大雷口

廣原嗥終風發怒土囊口萬艘萍無根
迺知積水厚龍鱗火熒熒鞭笞雷霆走
公私連檣休森如束春韭倚筇蒹葭灣
垂楊欲生肘雄文酬江山惜無韓與柳
五言呻吟內慚愧陶謝手送菜煩鄰舩
買魚熟溪友兒童報晦真正晝見箕斗

吾方廢晝眠鼻鼾鞞囊吼猶防盜窺家
嚴鼓申夜守冶城謝公墩牛渚蕩子婦
何時快登臨篙師分牛酒

乙未移舟出口

畏風濤復入遂宿焉同行有劉

三班善射沙夾遇盜劉手殺三人

江湖吞天曾蛟龍垂涎口養軀無千金
特為親故厚本心非華軒而與馬爭走
聘婦緝落毛教兒耨葱韭衣食端須幾

將老猶掣肘安能詭隨人曲折作杞柳
栢公甕盎癭楚國不龜手生涯但如此
那用託婚友久陰快夜晴天文若科斗
村南鬼火寒村北風虎吼野人驅鷄豚
縛落堅纏守劉郎弓石八猛氣壓馮婦
一試金僕姑歸飲軟臂酒

丙申泊東流縣

語曰東流速
客驚動建德

前日發大雷真成料虎頭今日伐鼓出

掉歌傲陽侯滄江百折來及此始東流
東流會賓客建德推羊牛野語尚信然
小市黃蘆洲唯有采薪翁經營往來舟
櫛櫪盡斤斧山童煙雨愁

阻風銅陵

頓舟古銅官晝夜風雨黑洪波崩奔去
天地無限隔舩人謹維竿何暇思掛席
憑江裂嵌空中有暗水滴洞視不敢前

潭潭蛟龍宅網師登長鱸賈我腥金萬
斑斑被文章突兀喙三尺言語竟不通
險喁亦何益魁梧類長者卒以筌餌得
浮沉江湖中波友永相失有生甚苦相
細大更噉食安得無垢稱對榻忘語默

阻水泊舟竹山下

竹山虫鳥朋友語討論陰晴忙風雨丁
寧相教防禍機草動塵驚忽飛去提壺

歸去意甚真柳暗花濃亦半春北風幾
日銅官縣欲過五松無主人

金陵

豪士阻江海瓜分域中權真人開關梁
曾不費一絰六朝妙人物蔓草縈寒煙
至今哀江南詠歌在漁船窮山虎豹穴
摩衲擁高年青天行日月坐看磨蟻旋
身將時共晚道與世相捐猶能攬壯觀

巨浸朝百川

時秀禪師在鍾山寺

十月十三日泊舟白沙江口

真州

唐永正縣之白沙鎮也

岸江倚帆檣已專北風權飛霜挾月下
百竿直如絃淥水去清夜黃蘆搖白煙
篙人持更柝相語聞竝舩平生濯纓心
鷗鳥共忘年風吹落塵網歲星奔回旋
險艱自得力細故可弃捐至今夢洶洶

呼禹濟黃川

河出崑崙崙嵒色白并渠井一千七百一川黃色

發白沙口次長蘆

篙師救首尾我為制中權挂席滿風力
如椎強弩絃曉放白沙口長蘆見炊煙
一葉託秋雨滄江百尺舩反觀世風波
誰能保長年念昔聲利區與世關周旋
大道甚間暇百物不廢捐誰知目力淨
改觀舊山川

阻風入長蘆寺

福公開百室不借鄰國權
法筵森龍象天樂下管絃
我來雨花地依舊薰爐煙
金碧動江水鍾魚到客船
茗椀洗昏著經行數徂年
歲寒風落山故鄉喜言旋
林回負赤子白壁乃可捐
持親如履冰風雨森暗川

次韻伯氏長蘆寺下

風從落帆休天與大江平
僧坊晝亦淨鍾磬寒逾清
淹留屬暇日植杖數連甍
頗與幽子逢煮茗當酒傾
携手霜木末朱欄見潮生
檣移永正縣鳥度建康城
薪者得樹鷄羹盂味南烹香
杭炊白玉飽飯愧閑行
叢祠思歸樂吟弄夕陽明
思歸誠獨樂薇蕨漸春榮

別蔣穎叔

金城千里要人豪理君亂然須孟勞文
星合在天東壁清都紫微醉雲璈荆溪
居士傲軒冕曾吞雲夢如秋毫三品衣
魚人仰首不見全牛可下刀秦川渭水
森長戟方壺蓬萊冠巨鼇萬釘寶帶瑤
玕席獻納論思近赭袍連營貔虎湛如
水開盡西河擁節旄何時出入諸公間
淮湖閱舫今二毛鑿渠決策與天合之

祈窘束縮怒濤衣食京師看上計 陛
下文武收英旄春風淮月動清鑿白拂
羽扇隨輕舸下榻見賢傾禮數後車載
士回風騷斲鼻於郢觀魚於濠小夫閱
人蓋多矣幾成季咸三見逃

贈別李端叔

我觀江南山如目不受垢憶食江南薇
子獨於我厚在北思江山如懷冰雪顏

千峯上雲雨岑絕何由攀當時喜文章
各有兒子氣爾來領須白有兒能拜起
讀書浩湖海解意開春冰成山更崇堀
顧我醜丘陵白玉著石中與物太落落
涇渭相將流世不名清濁乞言既不易
贈言良獨難古來得道人挂舌屋壁間
牧羊金華道載酒太玄宅支頤聽晤語
願君喙三尺我行風雨夜船窓聞遠雞

故人不可見故人心可知

汴岸置酒贈黃十七

吾宗端居聚百憂長歌勸之肯出游一作

百丈暮卷篙人休黃流不解浣明月碧一作

樹爲我生涼秋初平群羊置莫問叔度

千頃醉即休一作詩吟吾黨夜來誰倚

柁樓吹玉笛斗杓寒挂屋山頭

曉放汴舟

秋聲滿山河行李在梁宋川塗事雞鳴
身亦逐群動霜清魚下流橘柚入包貢
又持三十口去作江南夢

次盱眙同前韻

去此二十年持家西過宋起予者白鷗
歸興岌飛動宮殿明寶坊山川開禹貢
破浪一帆風更占夢中夢

外舅孫莘老守蘇州留詩斗野

亭庚申十月庭堅和

謝公所築埭未歎曲池平蘇州來賦詩
句與秋氣清僧構擅空闊湖光飛棟甍
唯斗天司南其下百瀆傾貝宮產明月
含澤遍諸生槃礴淮海間風煙侵十城
籟簫吹木末浪波沸庖烹我來杪搖落
霜清見魚行白鷗遠飛回得我若眼明
佳人歸何時解衣繞霜榮

庭堅得邑太和六舅按節出同
安邂逅於皖公溪口風雨阻留
十日對榻夜語因詠誰知風雨
夜復此對床眠別後更覺斯言
可念列置十字字爲八句寄呈
十首

鵠白不似烏蘭香端爲誰外家秉明德
晚與世參差乖離歲十二會面卒卒期

何言瀟丘底玉稻同一炊

滄江渺無津同濟共安危四海非不廣
舅甥自相知孔鸞在榛梅鷦鷯亦一枝
千里同明月相期不磷緇

少小長母家拊憐輩諸童食貧走八方
略已一老翁不能成宅相頗似舅固窮

何以報嘉德取琴作南風

一作鼓琴
歌南風

德人心寂寥立朝實莊語虎節坐山城

孤雲猶能雨文章被甥姪孝友諧婦女
偃息一畝宮植梅當歌舞

江都克家才萬卷書插架願言渠出仕

從舅問耕稼誰云瀕老境此子即長夜

歸歟水滸前期時橘鉏甘蔗

江都尉李
攄字安詩

曩窺涉世方白駒且場穀平生漫歲晚

志尚向山木返身觀小醜真成覆車犢

否臧太磊磊從此更三復

負薪反羊裘愛表只亦一作傷裏補紉雖

云工歲晏安可恃洗心如秋天六合無

塵滓浮雲風去來在彼不在此

阿驍學外堂德幹母思靡悔文成執桃

李不言行道允阿蘇妙言語機警言欲無

對子姪何預人蘭玉要可佩

阿蘇舅
氏幼子

解衣卧相語濤波夜掀牀十年身百憂

險阻心已降涉旬風更雨宿昔燭生光

衾幃無端冷明月一船霜

親依爲日淺愛不捨我眠教我如牧羊
更著後者鞭得邑邇梅嶺開花向春妍
碌碌幸苟免稱觴丈人前

同蘇子平李德叟登擢秀閣

築屋皖公城木末置曲欄歲晚對煙景
人家橘柚間獨秀司命峯衆丘讓高寒
松竹二橋宅雪雲三祖山衰懷造勝境

轉覺落筆難蘇李工五字屬聯不當慳

書石牛溪旁大石上

鬱鬱窈窈天官宅諸峯排霄帝不隔六
時謁天開關鑰我身金華牧羊客羊眠
野草我世間高真衆靈思我還石盆之
中有甘露青牛駕我山谷路

靈龜泉上

大靈壽日月化石皖公陂偶無斧斤尋

不作宰上碑傾首若有謂指泉來自西

泉甘崖木老坐歎欲忘歸風流裴通直

一作裴驥商略從我嬉蒔梅盈百科洗

石出崛竒更約聘石工饒我靈龜詩舅

弟妙學古亦復古須眉卿家北海公筆

法可等夷為我書斯文要與斗牛垂弟

李德叟

發舒州向皖口道中作寄李德叟

墨雲平屋簷一作崔嵬晨夜隔星月曉

裝商旅前冰底泥活活野人攘畔耕一作

侵畔蹇馬不能滑駝裘惜蒙茸俱落水

塘缺孤村小蝸舍乞火乾履韞前登極

崢嶸一作高寒他日飛鳥沒寒花委亂草耐

凍鳴風葉一作耐凍風葉間江形篆平

沙分派回勁筆孱弟不俱來得句漫剖

劄一作漫得却望同安城唯有松鬱鬱

遙知浦口晴諸峯見明雪

一作松雪

豐城

亭上有李衛公劍池賦世父長善石隄記

豐城邑巖巖水種六萬戶石隄眠長虹
輟棹日沉霧令君政有聲新亭延客步
淚落世父碑心傾文饒賦憶昔兩神兵
埋獄思武庫寒光射漢津兩賢紆一顧
張公折中台木拱孔章墓不能從兒嬉
歲晚龍虵去空餘寒泉泓因雨長蛙鮒

鈇刁藏寶室萬世同此度

與胡彥明處道飲勸師竹軒

井寒茶鼎甘竹密午陰好瓜嘗邵平種
酒為何侯倒倦須槃礴羸歸可倒著帽
欲去更少留道人談藥草

何氏悅亭詠栢

澗底長松風雨寒岡頭老栢顏色悅天
生草木臭味同同盛同衰見冰雪君莫

愛清江百尺船刀鋸來謀歲寒節千林
無葉草根黃蒼驍龍吟送日月

薄薄酒二章 并序

蘇密州爲趙明叔作薄薄酒二章憤世
疾邪其言甚高以予觀君之言近乎知
足不辱有馬少游之餘風故代作二章
以終其意

薄酒可與忘憂醜婦可與白頭徐行不

必駟馬稱身不必狐裘無禍不必受福
甘餐不必食肉富貴於我如浮雲小者
譴訶大戮辱一身畏首復畏尾門多賓
客飽僮僕美物必甚惡厚味生五兵匹
夫懷璧死百鬼瞰高明醜婦千秋萬歲
同室萬金良藥不如無疾薄酒一談一
笑勝茶萬里封侯不如還家
薄酒終勝飲茶醜婦不是無家醇醪養

牛等刀鋸深山大澤生龍蛇秦時東陵
千戶食何如青門五色瓜傳呼鼓吹擁
部曲何如春雨一池蛙性剛太傅促和
藥何如羊裘釣煙沙綺席象牀瑀玉枕
重門夜鼓不亭搗何如一身無四壁滿
船明月卧蘆花吾聞食人之肉可隨以
鞭朴之戮乘人之車可加以鈇鉞之誅
不如薄酒醉眠牛背上醜婦自能搔背痒

崑下放言五首

林居野處而貫萬事花落鳥啼而成四
時物有才德水為官師空明湛群木之
影搏擊下諸峯之巖游魚淨而知機君
子樂而忘歸

釣臺

水嬉者游魚林樂者啼鳥志士仁人觀
其大薪翁苟婦利其小有美一人獨燕
居萬物之表

池亭

石生涯於寒藤藤者造於崖樹鼈插翼
而成鵬隘六合而未翥我來兮自東攀
桂枝兮容與倚嵌崕兮顧同來謂公等
其皆去

冠鼈
臺

石蘊瓊璫山得其來之澤木無犧象天
開不才之祥屹金爐之突兀其山海之
來翔然以明哲之火熏以忠信之香俯
仰一時非智所及付與萬世其存者長

博
臺

蒼苔古木相依澗壑之濱黃葛女羅自
致風雲之上人就陰而息迹鳥投莫而
來歸水影林光常相助發溪聲斧響置
下稱提

靈樁
臺

題章和甫釣臺

斬木開亭却倚石壁寒灘百雷古木千
尺觀魚樂而相忘聽鳥啼而自得去而京

洛之間數年猶嘗夢斬崑之石

贈元發弟 放言

虧功一篲未成丘山鑿井九階不次水
澤行百里者半九十小狐汔濟濡其尾故
曰時乎時不再來終終始始是謂君子

定交詩效鮑明遠體呈晁無咎

以建除滿平定執破危成
字開開十二字冠為句首

建酉金為政搖落草木衰除瓜壠畝淨

邵平無米炊滿家色藜藿詩書不調飢
平生晁公子政用此時來定交無一物
秋月以為期執持荆山璧要我雕琢之
破斧不能柯况乃玉無疵危冠論百揆
備樂奏四時成功彼有命用舍君自知
收身渺江湖歲晚白鳥嬉開徑蒲葦中
倚鉏望君歸閉塞乃非道不才當爾為
建鼓求亡子元非入耳歌除去綠綺塵

水深山峩峩滿堂悅秦聲君獨用此何
平分感秋節空闊湛金波定夜百蟲息
高論聽懸河執攬北斗柄斟酌四時和
破屋仰見星得子喜且多危柱無安絃
野水自盈科成道在禮樂成山在丘阿
收此桑榆景相從寄琢磨開懷溟海闊
百怪出蛟鼉閉藏願自愛驚人取譴訶
碾建溪第一奉邀徐天隱奉議

并效建除體

建溪有靈草能蛻詩人骨除草開三逕
爲君碾立月滿甌泛春風詩味生牙舌
平斗量珠玉以救風雅竭定知胃中有
璀璨非外物執虎探虎穴斬蛟入蛟室
破鏡掛西南夜闌清興發危言諸公上
殊勝弄翰墨成仁冒鼎鑊聞已歸諫列
收汝救月弓蛙腹當拆裂開雲照四海

黃道行堯日閉門斲車輪出門同軌轍

再作荅徐天隱

建德真樂國萬里渺中州除蕩俗氛盡
心如九天秋滿船載明月乃可與同游
平生期斯人共挾風雅翰定知詩客來
夜虹貫斗牛執斧修月輪鍊石補天陬
破的千古下乃可泣曹劉危柱鳴哀箏
知音初見求成功在漏刻堯舜去共叟

收此文章戲往作活國謀開納傾萬方
皇極運九疇閉姦有要道新舊隨材收

重贈徐天隱

建極臨萬邦稽古陛下聖除書日日下
有耳家相慶滿意見外平父老扶杖聽
平生所傳聞似仁祖德性定鼎百世長
橐弓四夷靜執事當在朝官冷殊未稱
破帽風歌歌簡易不騎乘危顛相扶持泉

石共嘲詠成樂澗阿中傲世似未敬收
潦下秋船期公拜嘉命開元正觀事身
得見全盛閉門長蓬蒿或許老夫病
八音歌贈晁堯民註長與堯民
論出處之致未竟故終言之

金生寒沙中見會別有時石上千年栢
材高用苦遲絲亂猶可理心亂不可治
竹齋聞履聲迺是故人來匏苦只多葉

水深難為涉土牀不安席象牀卧擘擘
革與井同功守道非關怯木直常先伐
樗櫟萬世葉

八音歌贈晁堯民

金荷酌美酒夫子莫留殘石有補天材
虎豹守九關絲窠將柳花入戶撲衣冠
竹風搖永日思與子盤栢匏瓜豈無匹
自古同心難革急而韋緩只在揉化間

木桃終報汝藥石理予顏

古意贈鄭彥能

金欲百鍊剛不欲繞指柔石羊卧芳草
一卅如蜉蝣絲成蠶自縛智成龜自囚
竹箭天與美豈顧作嚆矢匏枯中笙竽
不用繫墻隅土偶與木偶未用相賢愚
革轍要合道覆車還不好木訥赤子心
百巧令人老

贈無咎

金馬避世客談諧玩漢朝石門抱關人
長往閉寂寥絲蟲日夜織勞苦則以食
竹生罹斧斤高林乃其賊匏樽酌吾子
雖陋意不淺土德貴重遲水德貴深遠
蚩能談鯤鵬晚乃得莊周木鴈兩不居
相期無待游

二十八宿歌贈別無咎

虎剥文章犀解角食未下亢竒禍作藥
材根抵罹斲掘蜜蟲奪房抱飢渴有心
無心材慧死人言不如龜曳尾衛平哆
口無南箕斗柄指日江使噫狐腋牛衣
同一燠高丘無女甘獨宿虛名挽人受
實禍累棊旣危安處我室中疑塵散髮
坐四壁齷齪見天下奎蹄曲隈取脂澤
婁豬艾豉彼何擇傾腸倒胃得相知貫

日食昴終不疑古來畢命黃金臺佩君
一言等甯鱗月沒參橫惜相違秋風金
井梧桐落故人過半在鬼錄柳枝贈君
當馬策歲晏星回觀盛德張弓射雉武
且力白鷗之翼沒江波抽絃去軫君謂何
壽聖觀道士黃至明開小隱軒
太守徐公爲題曰快軒庭堅集
句詠之

金華牧羊兒一粒粟中藏世界使君從
南來清風明月不用一錢買盧鷲杓鸚
鵡杯一杯一杯復一杯玉山自倒非人
推廬山秀出南斗傍登高送遠形神開
銀河倒挂三石梁砮崖倒石萬壑雷吟
詩作賦北窻裏安得青天化作一張紙
有長鯨白齒若雪山我願因之寄千里

銅官縣望五松山集句

北風無時休崩浪聒天響蛟鼉好爲祟
此物神俱王我來五松下白髮三千丈
松門閉青苔惜哉不得往今日天氣嘉
清絕心有向子雲性嗜酒况乃氣清爽
此人已成灰懷賢盈夢想衣食當須幾
吾得終踈放弱女雖非男出處同世網
搔背牧鷄鵝相見得無恙

地方百里身南面
翻手冷霜覆手炎
蒼壻得牛庭少訟
長官齋馬吏爭廉
邑中丞掾陰桃李
按上文書略米鹽
治狀要須聞豈弟
此行端為霽威嚴
天上麒麟來下瑞
江南橘柚間生賢
玉臺詩在猶騷雅
孺子亭荒只草煙
半世功名初墨綬
同兄文字敵青錢
割雞不合庖丁手
家傳風流更著鞭

荅德甫弟

鳥啼花發獨愁思
怜子三章怨慕詩
鴻鴈雙飛彈射下
鵲鴿同病急難時
功名所在猶爭死
意氣相須尚不移
何況極天無以報
林回投璧負嬰兒
時以父事兄弟俱在縲紲
何造誠作浩然堂
陳義甚高然頗喜
度世飛昇之說
築屋飯方士願乘
六氣遊天地間
故作浩

然詞二章贈之

公欲輕身上紫霞瓊糜玉饌厭豪華百
年世路同朝菌九鑰天關守夜叉霜檜
左紉空白鹿金爐同契漫丹砂要令心
地閒如水萬物浮沉共我家

萬物浮沉共我家清明心水遍河沙無鈎
狂象聽人語露地白牛看月斜小雨呼
兒藝桃李踈簾幃客轉琵琶塵塵三昧
開門戶不用丹田養素霞

池口風雨留三日

孤城三日風吹雨小市人家只菜蔬水
遠山長雙屬玉身閒心苦一春鋤翁從
旁舍來收網我適臨淵不羨魚俛仰之
間已陳迹莫窻歸了讀殘書

思親汝州作

鎮相富公以余
到官踰期下吏

歲晚寒侵遊子衣留拘幕府報官移五

更歸夢三百里一日思親十二時車上
吐茵元不逐市中有虎竟成疑秋毫得
失關何事忽為平生書到遲

次韻戲荅彥和

彥和年四十弃官杜門不出

本不因循老鏡春江湖歸去作閒人天
於萬物定貧我智効一官全為親布袋
形骸增硯磊錦囊詩句愧清新杜門絕
俗無行迹相憶猶當遣化身

衝雪宿新寨忽忽不樂

縣北縣南何日了又來新寨解征鞍山
銜斗柄三星沒雪共月明千里寒小吏
忽一作時須束帶故人頗問不休官江
南長盡梢雲竹歸及春風斬釣竿

郭明父作西齋于穎尾請予賦

詩二首

食貧自以官為業聞說西齋意凜然萬

卷藏書宜子弟十年種木長風煙未嘗
終日不思穎想見先生多好賢安得雍
容一樽酒女郎臺下水如天
東京望重兩并州遂有汾陽整綴旒翁
伯入關傾意氣林宗異世想風流君家
舊事皆青史今日高材未白頭莫倚西
齋好風月長隨三徑古人遊

戲詠江南土風

十月江南未得霜高林殘水下寒塘飯
香獵戶分熊白酒熟漁家擘蟹黃橘摘
金苞隨驛使禾舂玉粒送官倉踏歌夜
結田神社游女多隨陌上郎

和荅孫不愚見贈

詩比淮南似小山酒名淘米出雲安且
憑詩酒勤春事莫愛兒郎作好官簿領
侵尋台相筆風埃蓬勃使星鞍小臣才

力堪為掾敢學前人便掛冠

次韻裴仲謀同年

交蓋春風汝水邊
客牀相對卧僧氈
舞陽去葉才百里
賤子與公俱少年
白髮齊生如有種
青山好去坐無錢
煙沙篁竹江南岸
輸與鷓鴣取次眠

次韻寄滑州舅氏

舫齋聞有小溪山
便是壺公住謫天
想

聽瑣窻深夜雨似看葉水上江船瞻相
白馬津亭路寂寞雙鳧古縣前舅氏知
甥最踈懶折腰塵土解哀憐

病起次韻和稚川進叔倡酬之作

池塘夜雨聽鳴蛙
老境侵尋每憶家
白髮生來驚客鬢
黃梁炊熟又春華
百年不負膠投漆
萬事相依葛與瓜
勝日主人如有酒
猶堪扶病見鶯花

稚川約晚過進叔次前韻贈稚
川并呈進叔

人騎一馬鈍如蛙行向城東小隱家道
上風埃迷皂白堂前水竹湛清華我歸
河曲定寒食公到江南應削瓜樽酒光
陰俱可惜端須連夜發園花

和荅登封王晦之登樓見寄

縣樓三十六峯寒王粲登臨獨倚欄清

坐一番春雨歇相思千里夕陽殘詩來
嗟我不同醉別後喜君能自寬舉目盡
妨人作樂幾時歸得釣鯢相

伯氏到濟南寄詩頗言太守居

有湖山之勝同韻和

西來黃犬傳佳句知是陸機思陸雲歷
下樓臺追把酒舅家賓客厭論文山椒
欲雨好雲氣湖面逆風生水紋想得爭

棊飛鳥上行人不見只聽聞

同世弼韻作寄伯氏在濟南兼
呈六舅祠部學士

山光掃黛水接藍聞說樽前愜笑談伯
氏清脩如舅氏濟南蕭灑似江南屢陪
風月乾吟筆不解笙篁醉舞衫只恐使
君乘傳去拾遺今日是前街

世弼惠詩求舜泉輒欲以長安

酥共泛一杯次韻戲成

寒齋薄飯留佳客蠹簡殘編作近隣避
地梁鴻真好學著書揚子未全貧玉酥
鍊得三危露石火燒成一片春沙鼎探
湯供外飲不憂問字絕無人

伯父祖善耆老好學於所居紫
陽溪後小馬鞍山爲放隱齋遠
寄詩句意欲庭堅和之幸師友

同賦率尔上呈

樵入千巖靜松含萬籟寒兒童給行李
藜蔕對衣冠小檻聊防虎時來即解鞍
阿翁吹笛罷懷昔淚相看

次韻蓋郎中率郭郎中休官三首

仕路風波雙白髮閒曹笑傲兩詩流故
人相見自青眼新貴即今多黑頭桃合
柳花明曉市荻芽蒲笋上春洲定知聞

健休官去酒戶家園身自由

郭文特街
道市野服

過親黨飯頗為分臺
御史所詞故有此句

世態已更千變盡心源不受一塵侵作

險阻艱難
是非憂樂親得力鮑經心青春白日無公事紫

燕黃鸝俱好音付與兒孫知伏臘聽教

魚鳥遂飛沉黃公壚下曾知味定是逃

禪入少林

和張沙河招飲

張侯耕稼不逢年過午未炊兒女煎腹
裏雖盈五車讀囊中能有幾錢穿况聞
緼素尚共黃葛可怕雪花鋪白氈誰料丹
徒布衣得今朝忽有酒如川

閏月訪同年李夷伯子真於河

上子真以詩謝次韻

十年不見猶如此未覺斯人歎滯留白
璧明珠多按劍濁涇清渭要同流日晴

花色自深淺風軟鳥聲相應酬談笑一
樽非俗物對公無地可言愁

次韻郭右曹

閱世行將老斲輪那能不朽見仍雲歲
中日月又除盡聖處工夫無半分秋水
寒沙魚得計南山濃霧豹成文古心自
有著鞭地尺璧分陰未當勤

次韻元日

會朝四海登圖籍絳闕青都想盛容春
色已知回寸草霜威從此霽寒松飲如
嚼蠟初忘味事與浮雲去絕蹤四十九
年蘧伯玉聖人門戶見重重

和荅李子真讀陶庾詩

樂易陶彭澤憂思庾義城風流掃地盡
詩句識餘情往者不再作前賢畏後生
君言得意處此意少人明

次韻荅柳通叟求田問舍之詩

少日心期轉繆悠蛾眉見妬且障羞但
令有婦如康子安用生兒似仲謀橫笛
牛羊歸晚徑捲簾瓜芋熟西疇功名可
致猶回首何況功名不可求

過平輿懷李子先時在并州

前日幽人佐吏曹我行堤草認青袍心
隨汝水春波動興與并門夜月高世上

豈無千里馬人中難得九方臯酒船魚
網歸來是花落故溪深一篙

謝送宣城筆

宣城變樣蹲一作尊鷄距諸葛名家捋一作將
鼠鬚一束喜從公處得千金求買市中
無漫投墨客摹科斗勝與朱門飽蠹魚
愧我初非草玄手不將閑寫吏文書

王彦祖惠其祖黃州制草書其後

脫略看時輩諸君等發蒙董狐常直筆
汲黯少居中鵬入遷臣舍烏號厭世弓
平生有嘉樹猶起九原風

寄懷公壽

好賦梁王在日邊重簾複幕鎖神仙莫
因酒病踈桃李且把春愁付管絃愚知
相懸三十里榮枯同有百餘年及身強
健且行樂一笑端須直萬錢

讀曹公傳并序

曹公自以勲高宰衡文對西伯蟬蛻捐讓之中而用漢室於家巷更黨錮之災義士忠臣耘除略盡獻靈之間北面朝者拱而觀變漢魏何擇焉彼見宗廟社稷之無與也執太阿而用其穎以司一世之命左右無不得意引後宮於鈇鉞如刈蒲茅夫匹婦婢使得罪家人猶爲謝

過而親北面受命之君自以爲未知死所嗚呼厲憐王其誰曰過言雖然終已恭讓腹毒而色取仁任丕以易漢姓者何也漢之末造雖得罪於社稷骨鯁之臣而猶不得罪於民故猶相與愛其名耳余聞曰道揆以上惠不足而明有餘不在社稷而數有功染盛殆其不繼哉感之作曹公詩一章

南征北伐報功頻劉氏親爲魏國賓畢
竟以丕成霸業豈能於漢作純臣兩都
秋色皆喬木二祖恩波在細民駕馭英
雄雖有術力扶宗社可無人

懋宗奉議有佳句詠冷庭叟野
居庭堅於庭叟有十八年之舊
故次韻贈之庭叟有佳侍兒因
早朝而逸去其後迺插椒藩甚

嚴密

城西冷叟半忙閒人道王陽得早還四
望樓臺皆我有一原花竹住中間初無
狗盜窺籬落底事蛾眉失鎖關每爲朝
天三十里時時驚枕夢催班

李濠州挽詞二首

循吏功名兩漢中平生風義最雍容魚
遊濠上方云樂鵬在承塵忽告凶掛劍

自知吾已許脫驂不為涕無從百年窮
達都歸盡淮水空圍墓上松
禮數最優徐孺子風流不減謝宣城那
知此別成千古未信斯言隔九京落日
松楸陰墜道西風蕭鼓送銘旌善人報
施今如此隴水長寒嗚咽聲

衛南

今年畚鍤弃春耕折葦枯荷繞壞城白

鳥自多人自少污泥終濁水終清沙場
旗鼓千人集漁父風煙一笛橫唯有鳴
鷓古祠栢對人猶是向時情

歲寒知栢栢

松栢天生獨青青貫四時心藏後凋節
歲有大寒知慘淡水霜晚輪困澗壑姿
或容螻蟻穴未見斧斤遲搖落千秋靜
婆娑萬籟悲鄭公扶正觀已不見封彝

效進士作觀成都石經詩

成都九經石歲久麝煤寒字畫參工拙
文章可鑒觀危邦猶勸講相國校凋刊
群盜煙塵後諸生竹帛殘王春尊孔氏
乙夜詔甘盤願比求諸野成書上學宮

送徐景道尉武寧二首

李苦少人摘酒醇無巷深當官莫避事
為吏要清心葛藟松千尺寒泉縷百尋

朝有汲引吾子茂德音

與綬補一尉還依水竹居身隨南渡馬
書寄北來魚風俗諳鄰並艱難試事初
官閑莫歌舞教子誦詩書

奉送劉君昆仲

游子歸心日夜流南陵香草可晨著平
原曉雨半槐夏汾上午風初麥秋鴻鴈
要湏翔集早脊令無憾急難求欲因行

李傅家信姑射山前是晉州

勸交代張和父酒

風流五日張京兆今日諸孫困小官作
尹大都如廣漢畫眉仍復近長安三人
成虎事多有衆口鑠金君自寬酒興情
親俱不淺賤生何取罄交歡

雙井弊廬之東得勝地一區長
林巨麓危峯四環泉甘土肥可

以結茅菴居是在寅山之頽命

曰寅菴喜成四詩遠寄魯直可

同魏都士人共和之

臨大

一溪婉婉如平篆四野青青似畫圖阮
客放船迷洞府化人攜袂到清都山中
安用名丞相天下于今得廣居我即其
間構宮室預愁帝夢有華胥

山前有路到華胥下即軋坤極海隅西

接洞庭開曉楚東傾彭蠡浸晴吳四時
更代觀形化萬物推移見尾閭此世人
人少閑暇每携樽酒自看書

手把齊民種時書莎衫臺笠事耘鋤夏
栽醉竹餘千箇五月十三日醉春糞辰瓜蒲

百區瓜辰日種早秫旋舂嘗翅蘖新梁炊熟

自樵蘇日西杖屨行山口招得鄰丁作
飲徒

招得鄰丁作飲徒山家有款蓋胥踈就
根煨笋連黃籜和蒂栽瓜帶綠須羹熟
澤中親射鴈膾成溪上自罾魚遠懷羊
仲荒三徑能似林間今日無

次韻寅菴四首

四詩說盡菴前事寄遠如開水墨圖略
有生涯如谷口非無卜肆在成都旁籬
榛栗供賓客滿眼雲山奉宴居閑與老

農歌帝力年豐村落罷追胥

兄作新菴接舊居一原風物萃庭隅陸
機招隱方傳洛張翰思歸正在吳五斗
折腰慚僕妾幾年含眼夢鄉閭白雲行
處應垂淚黃犬歸時早寄書

大若塘邊擲網魚小桃源口帶經鉏詩
催孺子成雞柵茶約鄰翁掘芋區苦棟
狂風寒徹骨黃梅細雨潤如酥此時睡

到日三文自起開關招酒徒

未怪窮山寂寞居此中常與世情疎誰
家生計無閒地太半歸來已白須不用
看雲眠永日會思臨水寄雙魚公私逋
負田園薄未至妨人作樂無

送楊瓊鴈門親省二首

從子學
易業未

成辭
歸

執戟老翁年七十人看生理亦無聊草

立事業窺周易作賦聲名動漢朝今見
遠孫勤翰墨還持遺藁困簞瓢三年鄉
校趨晨鼓一日邊城聽夜刁野飯盈盤
厭葱韭春風半道解狐貂歸時定倒迎
門屣問鴈安能學度遼

蜀客出襄世獨外鄒魯堂蚊虻觀得失
虎豹擅文章吾子已強學草立宜不忘
江河須畎澮松柏要冰霜馬策路千里

鴈門書數行旨甘君有婦尺璧愛分光

次韻公定世弼登北都東樓四首

日著闌干角風吹濯漣衣喜同王季哲
更得謝玄暉清興俱不淺長吟無用歸
月明南北道猶見驛塵飛

真皇多廟勝仁祖用功深卜宅遷九鼎
破胡藏萬金百年休戰士當日縱前禽
欲斷匈奴臂不如留此心

都城礙飛鳥軍幕卧纓貅紫葢知蠶老
黃雲見麥秋接天雙闕起伏地九河流
蒼老深望幸鑾輿不好遊

漢皇勤遠略晚節相千秋不足中原地
猶思一戰收聖朝方北顧斜日倚東樓
廟筭知無敵寒儒浪自愁

次韻張祕校喜雪三首

落月煙沙靜渺然好風吹雪下平田瓊

瑤萬里酒增價桂玉一炊人少錢學子
已占秋食麥廣文何憾客無甕睡餘強
起還詩債臘裏春初未隲年

巷深朋友稀來徃日晏兒童不掃除雪
裏正當梅臘盡民飢可待麥秋無寒生
短棹誰乘興光入踈櫺我讀書官冷無
人供美酒何時却得步兵厨

滿城樓觀玉闌干小雪晴時不共寒潤

到竹根肥臘筍暖開蔬甲助春盤眼前
多事觀游少習次無憂酒量寬聞說壓
沙梨已動會須鞭馬蹋泥看

呻吟齋睡起五首呈世弼

棐几坐清晝博山凝妙香蘭牙依客土
柳色過鄰墻巷僻過從少宮閑氣味長
江南一枕夢高卧聽鳴榔

學省非簿領卧病常閉關雨餘樓閣靜

風晚鳥烏還賞逐四時政心安一味閒
古人雖已往不廢仰高山

蔬食吾猶飽曲肱哦古今酒傾因好事
絃絕爲知音妬蘂長春木爭巢喧莫禽
長懷阮校尉北望首陽岑

已把社公酒春寒那得嚴厭聽鷓啄雪
喜有燕穿簾璞玉深藏器囊錐立見尖
兒時愛談道今日口如箝

墻下蓬蒿地兒童課剪除蔓蒿隨分種
杞菊未須鉏河水傳烽火交州報捷書
無能落閑處暫媿飽春蔬

次韻師厚萱草

從來占北堂雨露借恩光與菊亂佳色
共葵傾太陽人生眞苦相物理忌孤芳
不及空庭草榮衰可兩忘

次韻師厚雨中晝寢憶江南餅

麴酒

雨砌無車馬風簾洒靜便忽思江外酒
準擬醉時眠隱几唯觀化開書屢絕編
遙知煙渚夢遣騎喚漁船

和師厚郊居示里中諸君

籬邊黃菊關心事窻外青山不世情江
橘千頭供歲計秋蛙一部洗朝醒歸鴻
往燕競時節宿草新墳多友生身後功

名空自重眼前樽酒未宜輕

和師厚秋半時復官分司西都
遙知得謝分西洛無復肯彈冠上塵茵
地除瓜猶入市水田收秣未全貧杜陵
白髮垂垂老張翰黃花句句新還與老
農爭坐席青林同社賽田神

和外舅夙興三首

寓大雲寺作

瓜蔓已除龍舌痕猶上墻蓬蒿負雨露

松竹見冰霜卷幔天垂斗披衣日在房
無詩歎不遇千古一潛郎

風烈僧魚響霜嚴郡角悲短童疲洒掃
落葉故紛披水凍食鮭少甕寒浮蟻遲
朝陽烏鳥樂安穩託禪枝

暑逐池蓮盡寒隨塞鴈來衣裘雖得暖
狐貉王相哀僧汲轆轤曉車鳴關鎖開
不因朝鼓起來帙亂書堆

和師厚接花

妙手從心得接花如有神根株穰下土
顏色洛陽春雍也本犁子仲由元鄙人
外堂與入室只在一揮斤

和師厚栽竹

大隱在城市此君真友生根湏辰日斲
筍要上番成龍化葛陂去鳳吹阿閣鳴
草荒三徑斷歲晚見交情

次韻外舅謝師厚喜王正仲三
丈奉詔相南兵回至襄陽捨驛
馬就舟見過三首

漢上思見龐德公別來悲歎事無窮聲
名籍甚漫前日湏鬚索然成老翁家釀
已隨刻漏下園花更發三四紅相逢不
飲未為得聽取百鳥啼怱怱
能來問疾好音傳蹇步昏花當日痊烹

鯉得書增目力呼兒扶立候門前游談
取重慙犀首居物多羸昧計然惟有交
親等金石白頭忘義復忘年

語言少味無阿堵冷雪相看有此君燈
火詩書如夢寐麒麟圖畫屬浮雲平章
息女能為婦歡喜兒曹解綴文憂樂同
科惟石友別離空復數朝曛

豫章先生外集卷第六

豫章先生外集卷第七

律詩

叔父釣亭

檻外溪風拂面涼四圍春草自鉏荒陸
沉霜髮為鈎直柳貫錦鱗緣餌香影落
華亭千尺月夢通歧下六州王麒麟卧
笑功名骨不道山林日月長

元豐癸亥經行石潭寺見舊和

栖蟾詩甚可笑因削拊滅藁別

和一章

千里追犇兩蝸角百年得意大槐宮空
餘祇夜數行墨不見伽黎一臂風俗眼
止如當日白我顏非復向來紅浮生不
作游絲上即在塵沙逐轉蓬

次韻胡彥明同年羈旅京師寄

李飛三章一章道其困窮第二章

勸之歸三章言我亦欲歸耳胡
李相甥也故有檳榔之句

看除日月坐中銓一歲應無官九遷葱
韭盈盤市門食詩書滿枕客床氈留連
節物孤朋酒惱亂隣翁謁子錢誰料丹
徒布衣得困窮且忍試新年

丁未同升鄉里賢別離寒暑漫推遷蕭
條羈旅深窮巷蚤晚聲名上細氈碧嶂

清江元有宅白魚黃雀不論錢
檳榔一斛何須得李氏弟兄佳少年
畏人重祿難堪忍閱世浮雲易變遷
徐步當車飢當肉鋤頭爲枕草爲氈
元無馬上封侯骨安用人間使鬼錢
不是朱門爭底事清溪白石可忘年

出迎使客質明放船自瓦窑歸
鼓吹喧江雨不開丹楓落葉放船回
風

行水上如雲過地近嶺南無鴈來樓閣
人家捲簾幕菰蒲鷗鳥樂灣洄惜無陶
謝揮斤手詩句縱橫付酒杯

奉寄子由 大臨

鍾鼎功名淹筦庫朝庭翰墨寫風煙
遙知道院頗岑寂定是壺中第幾天
歷下笑談漫一夢江南消息又餘年
動心忍性非無意吏部如今信大顛

奉荅元明 轍

故人聚散霜前葉往事渺茫風際煙游
官一生非有已隱居萬事不由天崎嶇
檻穽方謀食笑傲山林肯計年賴已將
心問盧老相逢他日笑風顛

次韻奉寄子由

半世交親隨逝水幾人圖畫入凌煙春
風春雨花經眼江北江南水拍天欲解

銅章行問道定知石友許忘年脊令各
有思歸恨日月相催雪滿顛

再次韻奉荅子由

蠶尾銀鈎寫珠玉剡藤蜀繭照松煙似
逢海若談秋水始覺醯雞守甕天何日
清揚能覲面只今黃落又周年萬錢買
酒從公醉一鉢行歌聽我顛

再次韻寄子由

想見蘇耽携手僊青山桑柘冒寒煙麒
麟墮地思千里虎豹憎人上九天風雨
極知雞自曉雪霜寧與菌爭年何時確
論傾樽酒醫得儒生自聖顛

出素問

次韻寄上七兄

學得屠龍長縮手鍊成五色化蒼煙誰
言遊刃有餘地自信無功可補天啼鳥
笑歌追暇日飽牛耕鑿望豐年荷鋤端

欲相隨去邂逅青雲恐疾顛

吉老受秋租輒成長句

黃花事了綠叢霜蟋蟀催寒夜夜床愛
日捃收如盜至失時鞭朴柰民瘡田夫
田婦肩頰檐江北江南稼滌場少忍飛
糠眯君眼要令私廩上公倉

再次韻和吉老

今日僕姑晴自語愁陰前日雪鋪床三

冬一雨禾頭濕百斛幾痕牛領瘡民欲
與翁歸作臘公方無事可開場相勤凍
坐真成惡愧我偷閑飽太倉

寄黃從善

故人千里隔談經想見牛刀刃發斲渴
雨芭蕉心不展未春楊柳眼先青鳧飛
葉縣郎官宰虹貫江南處士星天子文
思求逆耳吾宗一爲試雷霆

登快閣

癡兒了却公家事快閣東西倚晚晴落
木千山天遠大澄江一道月分明朱絃
已爲佳人絕青眼聊因美酒橫萬里歸
船弄長笛此心吾與白鷗盟

題息軒

僧開小檻籠沙界鬱鬱參天翠竹叢萬
籟參差瀉明月一家寥落共清風蒲團

禪板無人付茶鼎薰爐與客同萬水千
山尋祖意歸來笑殺舊時翁

荅余洪範二首

道在東南祖詩如大小山一家同雪月
萬里廢機關天上麒麟閣山中虎豹閑
何時得丘壑明鏡失朱顏

懸罄齋厨數米炊貧中氣味更相思可
無昨日黃花酒又是春風柳絮時

題安福李令朝華亭

丹楹刻桷上崢嶸表裏江山路

一作眼

平曉日成霞張錦綺青林多露綴珠纓
人如旋磨觀群蟻田似圍碁據一枰對
案昏昏迷簿領暫來登覽見高明

寄舒申之戶曹

吉州司戶官雖小曾屈詩人杜審言今
日宣城讀書客還過手板傍轅門江山

依舊歲時改桃李欲開煙雨昏公退但
追紅袖飲剩傳歌曲教新翻

和七兄山預湯

厨人清曉獻瓊糜正是相如酒渴時能
解飢寒勝湯餅略無風味笑蹲鴟打窓
急雨知然鼎亂眼睛雲看上匙已覺塵
生雙井椀濁醪從此不須持

奕棊二首呈任公漸

偶無公事負朝暄三百枯棊共一樽坐
隱不知巖穴樂手談勝與俗人言簿書
堆積塵生案車馬淹留客在門戰勝將
驕疑必敗果然終取敵兵翻

偶無公事客休時席上談兵校

角一作兩

棊心似蛛絲遊碧落身如蜩甲化枯枝
湘東一目誠可死天下中分尚可持誰
爲吾徒猶愛日參橫月落不曾知

次韻幾復荅予所贈三物三首
誰憐湖海士白髮夜窓檠風雨鷄不已
詩書眼尚明禪枝安宿鳥僧粥吼華鯨
但滿五車讀行看一座傾

右石燈檠

絕域薔薇露他山菡萏鑪稍薰衣一筦
似慰客心孤遊子夢蟻穴謫仙居瓠壺
霏霏麗絲網清興可能無

右石博山

九原誰復起糟魄未傳心不取丁儀米
疑成校尉金名從高位借德有下僚沉
筆削多瑕點猶希畏友箴

德人沉救谷規如此慵疎廢古今

右石刻

靜居寺上方南入一徑有釣臺
氣象甚古而俗傳謬妄意嘗有

隱君子漁釣其上感之作詩

避世一丘壑似漁非世漁獨吟嘉橘頌
不遺子公書笋蕨園林晚絲緡歲月除
安知冶容子紅袖泣前魚

侯尉之吉水覆案未歸三日泥

雨戲成寄之

歎息侯嬴老尉曹鞍馬疲山花迷部曲
江雨壓旌旗越鳥勸沽酒竹雞憂蹋泥

不知何處醉遙寄解醒詩

次韻吉老寄君庸

何郎生事四立壁心地高明百不憂白
眼醉來思阮籍碧雲吟罷對湯休諸公
著力書交上尺璧深藏價未酬空使君
如巢幕燕將鷁處處度春秋

寄素守廖獻卿

公移猥甚叢生笋訟牒紛如蜜分窠少

得曲肱成夢蝶不堪衙吏報鳴鼃已荒
里社田園了可柰春風桃李何想見宜
春賢太守無書來問病維摩

廖袁州次韻見荅并寄黃靖國
再生傳次韻寄之

春去懷賢感物多飛花高下胃絲窠傳
聞治境無戾虎更道豐年鳴白鼃史筆
縱橫窺寶鉉于寶作搜神記徐鉉作稽
神錄當時謂寶鬼之董狐

詩才清壯近陰何寄聲千萬相勞苦如
倚胡床得按摩

袁州劉司法亦和予摩字詩因
次韻寄之

袁州司法多兼局日莫歸來印幾窠詩
罷春風榮草木書成快劍斫蛟鼃遙知
吏隱清如此應問卿曹果是何頗憶病
餘居士否在家無意食蘿摩

次韻奉荅吉老并寄何君庸

傾懷相見開城府
取意閑談沒日窠
但使吏曹無狡兔
任呼舞女伐靈鼉
屢中甕面酒
幾聖苦憶樽前人
姓何願得兩公俱
助我不唯朱墨要漸摩

次韻奉荅廖袁州懷舊隱之詩

詩題怨鶴與驚猿
一幅溪藤照麝煙
聞道省郎方結綬
可容名士乞歸田
嚴安

召見天嗟晚賈誼
歸來席更前
何況班家有超固
應封定遠勒燕然

觀王主簿家醅醪

肌膚玉雪薰沉水
百草千花莫比芳
露濕何郎試湯餅
日烘荀令炷爐香
風流徹骨成春酒
夢寐宜人入枕囊
輸與能詩王主簿
瑤臺影裏據胡床

社日奉寄君庸主簿

花發社公雨陰寒殊未開初聞燕子語
似報玉人來遮眼便書冊挑龔欺酒盃
傳聲習主簿勤為撥春醅

次韻元翁從王夔正借書

為吏三年弄文墨草萊心徑失耕鋤常
思天下無雙祖得讀人間未見書公子
藏山真富有小儒捫腹正空虛何時管
鑰入吾手為理籤題撲蠹魚

去歲和元翁重到雙澗寺觀余
兄弟題詩之篇總忘收錄病中
記憶成此詩

素琴聲在時能聽白鳥盟寒久未尋眼
見野僧垂雪髮養親元不顧朱金開泉
浸稻雙澗水煨笋春盤春竹林安得一
廛吾欲老君聽莊舄病詩吟

次韻知命入青原山口

坑路羊腸繞稻田
碁局方林間塔餘寸
風外竹斜行吠客
犬反走驚人鳥坐忙
山形與祖印岑絕兩相當

次韻吉老知命同遊青原二首

洗鉢尋思去論詩
匡鼎來鷓窺錫處井
魚泳釣時臺垂足
收親子存身亘劫灰
僧雛手金鑰一爲道人開

至人來有會吾道本無家
閱世魚行水

遺書鳥印沙齋孟香佛飯法席雨天花
時有清談勝還同歎永嘉

次韻十九叔父臺源

聞道臺源境鉏荒三徑通
人曾夢蟻穴
鶴亦怕鷄籠萬壑秋聲別
千江月體同
須知有一路不在白雲中

次韻曾都曹喜雨

水旱國代有人神理本通徧
雩詞小大敢

拍蠅雌雄地厭焚燄極天回顧盼中蛟
龍起乖臥星斗晦澄空雲挾雷聲走江
翻電脚紅寵光歸稼穡滴瀝在梧桐詖
訟猶相忍時霖恐未豐潔齋斲得歲同
病託諸公

發顛上寄余洪範

二川來集南康郡氣味相似相和流木
落山明數歸鴈鬱孤欄楮繞深秋曾中

淳于吞一石塵下庖丁解十牛它日欲
言人不解西風散髮掉扁舟

同韻和元明兄知命弟九日相
憶

革囊南渡傳詩句摹寫相思意象真九
日黃花傾壽酒幾回青眼望歸塵蚤爲
學問文章誤晚作東西南北人安得田
園可溫飽長拋簪紱裹頭巾

萬水千山厭問津
芭蕉林裏自觀身
鄰田雞黍留熊也
風雨關河走阿秦
鴻鴈池邊照雙影
脊令原上憶三人
年年獻壽須歡喜
白髮黃花映角巾

題吉州承天院清涼軒

菩薩清涼月遊於畢竟空
我觀諸境盡心與古人同
僧髮侵眉白桃花映竹紅
儻來尋祖意展手似家風

題槐安閣 并序

東禪僧進文結小閣於寢室東養生之
具取諸左右而足彼雖聞中天之臺百
常之觀蓋無慕嫫之心予爲題曰槐安
閣而賦詩夫據功名之會以媻媻一世
其與蟻丘亦有辨乎雖然陋蟻丘而仰
泰山之崇嶽猶未離乎俗觀也
曲閣深房古屋頭病僧枯几過春秋垣

衣蛛網蒙窓牖万象縱橫不繫留白蟻
戰酣千里血黃梁炊熟百年休功成事
遂人間世欲夢槐安向此游

太和奉呈吉老縣丞

山擁鳩民縣江橫決事廳土風尊健訟
吏道要繁刑解觥今無種蒲盧教未形
里多齊暱氏材謝宋庖丁令尹三年課
斯人萬物靈吾方師豈弟僚友助丹青

暱氏漢書音翊而今齊南田家有此姓音諫也

子範徼巡諸鄉捕逐群盜幾盡

輒作長句勞苦行李

白髮尉曹能挽弓著鞭跨馬欲生風乃
兄本是文章伯此老真成矍鑠翁抱鼓
諸村宵警報牛羊幾處莫牢空得公萬
戶開門卧看取三年最治功

喜太守畢朝散致仁

膏火煎熬無妄災就陰息迹信明哉功
名富貴兩蝸角險阻艱難一酒杯百體
觀來身是幻萬夫爭處首先回曾中元
有不病者記得陶潛歸去來

戲贈南安倅柳朝散

柳侯風味晚相見衣袂頗薰荀令香桃
李能言妙歌舞樽前一曲斷人腸洞庭
歸客有佳句庾嶺梅花如小棠乘興高
帆少相待淮湖秋月要傳觴

次韻君庸寓慈雲寺待詔惠錢不至

主簿看梅落雪中閨人應賦首飛蓬問
安兒女音書少破笑壺觴夢寐同馬祖
峯前青未了鬱孤臺下水如空江山信
美思歸去聽我勞歌亦欲東

次韻奉荅存道主簿

主簿朝衣如敗荷高懷千尺上松蘿
旅人爭席方歸去秋水黏天不自多
學到會時忘粲可詩留別後見羊何
向來四海習鑿齒今日期君不啻過

題神移仁壽塔

十二觀音無正面誰令塔戶向東開
定知四梵神通力曾借六丁風
雨催蠅說冰霜如夢寐鷄聞鐘鼓亦驚猜
從今不

信維摩詰斷取三千世界來

次韻漢公招七兄

白髮霏霏雪點斑朱櫻忽忽鳥銜殘
公庭休吏進湯餅語燕無人窺井欄
詩句多傳知有暇道人相見不應難
老郎親屈延處士風味依稀如姓栢
栢四禮處士劉璩之

鄭粲甚厚

送高士敦赴成都鈐轄二首

玉鈴金印臨參井控蜀通秦四十州日
下書來望鴻鴈江頭花發醉貔貅巴滇
有馬駒空老林箐無人葉自秋能爲將
軍歌此曲鳴機割錦與纏頭
捧日高宣事東京四姓侯軍中聞俎豆
廟勝脫兜鍪熬燒燭海棠夜香衣藥市秋
君平識行李河漢接天流

元明題哥羅驛竹枝詞

尺五攀天天天慘顏鹽煙溪瘴鎖諸蠻平
生夢亦未嘗處聞有鷓飛不到山風黑
馬跪驢瘦嶺日黃人度鬼門關黔南去
此無多遠想在夕陽猿嘯間

題李十八知常軒

身心如一是知常事不驚人味久長蓋
世功名棊一局藏山文字紙千張無心
海燕窺金屋有意江鷗傍草堂驚破南

柯少時夢新晴鼓角報斜陽

次韻奉荅吉鄰機宜

黠虜乘秋屢合圍上書公獨請偏師庭
中子弟芝蘭秀塞上威名草木知千里
折衝深寄此三衙虛席看除誰與公相
見清班在 仁祖重來築舊基

送曹黔南口號

摩圍山色醉今朝試問歸程指斗杓荔

子陰成棠棣愛竹枝歌是去思謠陽關
一曲悲紅袖巫峽千波怨畫撓歸去天
心承雨露雙魚來報舊賓僚

清明

佳節清明桃李笑野田荒壠只生愁雷
驚天地龍蛇蟄雨足郊原草木柔人乞
祭餘驕妾婦士甘焚死不公侯賢愚千
載知誰是滿眼蓬蒿共一丘

元明留別

枕椰笋白映玉箸椰子酒清宜貝觴市
井衣裘半夷夏陰晴朝暮變炎涼莫推
月色共千里不寄江南書一行無賴笳
聲上雲漢曉來偏繞九回腸

豫章先生外集卷第七



